

Perbincangan Abdullah-Manmohan

um - 15/1/2007

CEBU CITY, Filipina 14 Jan. - Perdana Menteri, Datuk Seri Abdullah Ahmad Badawi mengadakan pertemuan dua hala dengan rakan sejawatannya dari India, Manmohan Singh yang berada di sini untuk menghadiri siri sidang kemuncak susulan ASEAN.

Pertemuan kedua-dua pemimpin berlangsung kira-kira 30 minit di Hotel Shangri-La, lokasi Sidang Kemuncak ASEAN Ke-12.

Manmohan pernah berada di Kuala Lumpur untuk menghadiri Sidang Kemuncak Asia Timur (EAS) pada Disember 2005.

Difahamkan, pertemuan kedua-dua mereka antara lain membincangkan soal rundingan Perjanjian Perdagangan Bebas (FTA) antara Malaysia dan India.

Esok, Abdullah dijadual mengadakan pertemuan dua hala dengan Perdana Menteri New Zealand, Helen Clark.

Selepas pertemuan itu, Abdullah dan Manmohan serta pemimpin-pemimpin ASEAN yang lain meneruskan program mereka dengan menghadiri Sidang Kemuncak ASEAN-India Kelima di Sugbu Summit Hall di sini.

Hubungan ASEAN-India menjadi semakin penting terutama dalam perdagangan kerana India semakin mengukuhkan kedudukannya sebagai kuasa besar dalam ekonomi dan perdagangan di rantau Asia.

Hari ini, Abdullah mengambil bahagian dalam Sidang Kemuncak ASEAN yang berasingan membabitkan China, Jepun dan Korea Selatan serta Sidang Kemuncak ASEAN+3 membabitkan ketiga-tiga negara Asia Timur itu sekali gus.

- Utusan



ABDULLAH Ahmad Badawi menerima kunjungan hormat Perdana Menteri India, Manmohan Singh di biliknya di Shangri-La Hotel, Pulau Mactan, Cebu City, semalam.

- Bernama